

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK HAJI DATU NASRUN BIN DATU MANSUR
(SILAM)**

PERTANYAAN : LISAN

TARIKH : 09.06.2014

Y.B. DATUK HAJI DATU NASRUN BIN DATU MANSUR [SILAM] minta **MENTERI KEWANGAN** menyatakan apakah mekanisme terbaik yang telah diambil oleh Kerajaan dalam mempersiapkan Malaysia dari kemelut krisis ekonomi global pada masa akan datang, selain kaedah merasionalisasi subsidi. Apakah pula pendekatan dan usaha Kementerian dalam meningkatkan kuasa beli rakyat.

JAWAPAN

Tuan Yang di-Pertua,

Sebagai sebuah ekonomi yang sangat terbuka, Malaysia terdedah kepada kemelut ekonomi global menerusi aliran perdagangan dan kewangan. Sehubungan dengan itu, mekanisme terbaik yang diambil oleh Kerajaan untuk menyediakan negara dalam menghadapi kemelut ekonomi global adalah bagi memastikan ekonomi negara terus berdaya tahan dan berdaya saing serta menjamin kesejahteraan rakyat.

1. Kerajaan telah mengambil pelbagai inisiatif bagi memastikan ekonomi negara akan terus berkembang meskipun berdepan dengan persekitaran luar yang tidak menentu. Inisiatif ini turut memberi penekanan kepada usaha berdaya tahan dan berdaya saing termasuk mempelbagaikan dan memperkuuh sumber pertumbuhan seperti menerokai pasaran eksport baharu; meningkatkan peralihan kepada aktiviti nilai tambah tinggi; meliberalisaikan sektor perkhidmatan; meningkatkan produktiviti, kreativiti dan inovasi; serta merancakkan permintaan dalam negara supaya mengurangkan kesan kelembapan permintaan luar. Selain itu, usaha turut diberi perhatian bagi menambahbaik penyampaian perkhidmatan awam supaya memudahcarkan sektor swasta bagi memacu pertumbuhan ekonomi;

serta memperkuuh penglibatan usahawan termasuk perusahaan kecil dan sederhana dalam kegiatan ekonomi.

2. Dalam pada itu, Kerajaan sentiasa memberi tumpuan kepada pembangunan modal insan menerusi pendidikan dan latihan supaya tenaga pekerja kita sedia menghadapi persekitaran yang lebih mencabar. Kerajaan juga terus memastikan sistem perbankan kekal teguh supaya dapat menyokong kegiatan ekonomi. Selain itu, Kerajaan telah memperkenalkan pelbagai inisiatif transformasi, khususnya Program Transformasi Ekonomi (ETP) untuk menganjak Malaysia kepada negara maju berpendapatan tinggi menjelang tahun 2020.

3. Menerusi pendekatan pragmatik yang diambil oleh Kerajaan serta pemantapan daya tahan dan daya saing negara, Malaysia telah berjaya mengharungi beberapa tempoh yang mencabar seperti krisis kewangan Asia pada tahun 1997/1998 dan krisis kewangan global pada tahun 2008/2009. Kini Malaysia berada pada landasan kukuh untuk mencapai status negara maju berpendapatan tinggi menjelang tahun 2020. Ini dapat dilihat daripada beberapa penunjuk utama. Pendapatan negara kasar per kapita telah meningkat 43% daripada dolar Amerika 7,059 pada 2009 kepada dolar Amerika 10,095 pada 2013, bererti negara mampu mencapai sasaran dolar Amerika 15,000 pada 2020. Ekonomi

negara juga menunjukkan pertumbuhan yang memberangsangkan dengan mencatat Keluaran Dalam Negeri Kasar (KDNK) sebanyak 6.2% dalam suku pertama 2014 (S4 2013: 5.1%). Ini jelas menunjukkan bahawa sektor swasta kini menerajui pertumbuhan ekonomi dengan menyumbang pelaburan sebanyak RM44.4 bilion atau 66.5% daripada jumlah pelaburan dalam tempoh suku pertama 2014.

4. Kedudukan daya saing global negara semakin bertambah baik. Laporan *World Bank Doing Business 2014* menunjukkan daya saing Malaysia melonjak kepada kedudukan ke-6 daripada tempat ke-12 pada 2013. Begitu juga dengan laporan *IMD World Competitiveness Yearbook 2014*, menunjukkan daya saing Malaysia meningkat kepada tempat ke-12 daripada kedudukan ke-15 pada 2013.

Tuan Yang di-Pertua,

1. Berhubung dengan usaha bagi meningkatkan kuasa beli rakyat,

pelbagai langkah telah dilaksanakan agar kesejahteraan rakyat terbela. Antara langkahnya adalah pelaksanaan dasar gaji minimum bagi menjamin rakyat dapat memenuhi keperluan asas; pemberian Bantuan Rakyat 1Malaysia (BR1M); dan penyediaan inisiatif seperti Kedai Rakyat 1Malaysia, Menu Rakyat 1Malaysia dan Klinik 1Malaysia. Selain itu, Kerajaan juga menyediakan kemudahan dan insentif untuk menggalakkan tenaga kerja meningkatkan pengetahuan dan kemahiran supaya mereka dapat meningkatkan produktiviti dengan bayaran gaji dan upah yang lebih tinggi dan seterusnya kuasa beli. Dalam pada itu, turut disedia pelbagai inisiatif seperti kemudahan fasiliti dan pembiayaan untuk menggalakkan para belia dan suri rumah menceburil bidang keusahawanan supaya mereka mampu meraih pendapatan perniagaan. Program Transformasi Ekonomi pula akan mendorong perkembangan ekonomi yang dapat menjana lebih banyak peluang pekerjaan dan sekaligus meningkatkan pendapatan dan kuasa beli rakyat.